

Musica popolare cun tuns moderns

Terz inscunter da musica populara a Strada

■ (anr/afi) **Nouv chapellas dal Grischun ed üna dal Vallais s'han partecipadas d'incuort al terz inscunter da musica populara a Strada. Adüna dapli giuventüna as lascha incharar da quista sort da musica.** «Quists inscuntes promovuan l'amicizcha tanter las diversas fuormaziuns», ha dit l'iniziant ed organisatur *Rudolf Fliri* invers l'anr. Plü bod organisava i'l hotel Waldhaus a Vulpera da quists inscuntes. A l'invid da la Chapella Engiadina sun seguits duos fuormaziuns da Cuaira e dal Partenz, üna gruppa dal Vallais e quatter da l'Engiadina Bassa.

Promouvoir la giuventüna

«Ün fat allegraival es cha blera giuventüna fa part a quistas fuormaziuns», ha dit Rudolf Fliri. Ün böt da Fliri es da motivar ed intimar la giuventüna per quista sort da musica. Cuntschaint es la Chapella Engiadina eir per sia fuormaziun cun lur trais generaziuns: *Mengia* e Rudolf Fliri-Erni cun lur trais figlias *Maria Pardeller*, *Uorschlina Beer* e *Sara Fliri Etter* ed ils abiadis *Moreno Pardeller*, *Fiona Beer*, *Niculin* e *Claudio Etter* sco eir *Bruno Kirchen*. «Nus eschan stats culs abiadis al principi da lügl a St. Croix ad ün inscunter da musica populara per fuormaziuns da giuvenils e vain sunà live per ün'emischiun da radio», ha'l quintà. Plünavant ha manzunà Fliri cha cha la fuormaziun dals juniors sunan els tocs vegls da la musica engiadinaisa.

La motivaziun dal bazegner

Fiona Beer da Zernez, ün'abiadia da Rudolf Fliri, suna daspö ün pèr ons la gĩa. «Adonta cha la gĩa es in prüma lingia ün instrumaint per la musica classica as poja sunar eir oters stils da musica», ha'l



Ils Stelser Buaba dal Partenz han pisserà per buna glüna.

FOTOS A. FILLI

dit. Illa musica dals Fränzlis ed in blers oters stils populars es la gĩa ün instrumaint important. «Pel mumaint fetscha musica impustüt insemel cun meis cusdrins e cun nona e bazegner», ha'l manzunà. Per ella tocca la musica simpla maing pro la vita dal minchadi. Eir pro seis cusdrin, Moreno Pardeller, es il bazegner la persuna chi motivescha da far musica. El ha impraiss a sunar l'orgelin ed ha mania: «Ad inscuntes da musica populara as vezza per gronda part glied plü veglia». Tenor el es la Svizra Centrala

cuntschainta per la promoziun da la giuventüna in quista sparta. «Eu nu cugnusch blers giuvenils in Engiadina chi fan musica populara», ha'l constatà.

Tuns moderns illa musica populara

Chi's po sunar cun quatter orgelins ed ün giün eir musica moderna ha demuossà la Hüsmüsig Eggerberg dal Vallais. Il sunar musica populara es pro els üna roba da famiglia: Insemel cun lur trais uffants es la famiglia Eggerberg ün giast regular a l'inscunter a Strada. Blers amatur da la

musica populara attira adüna darcheu la fuormaziun «Stelser Buaba» da Stels i'l Partenz. Ils trais frars *Joos*, *Andrea* e *Vali Meier* sunan insemel cun *Claudia Lietzha-Meuli* e la sour la plü giuvna *Elsbeth* illa tipica fuormaziun grischunaisa. Eir els han preschantà musica populara cun tuns moderns. La saira es ida inavant culs concerts da tuot las gruppas statts invidadas. «Meis giavüsch es cha quist inscunter da musica populara a Strada dvainta ün arrandschamaint tradiziunal», ha conclus Rudolf Fliri.



La Hüsmüsig Eggerberg dal Vallais es üna chapella da famiglia.



Fiona Beer (a schnestra) insemel cun sia cusdrina.



Decoraziun da maisa musicala.



Gabi Degonda es statta la moderatura da l'inscunter da musica populara a Strada.



La sala da Strada ill'insaina da la musica.

NOVITADS DA RTR

Hotels e chasas da vacanzas a Scuol cun perditas pervi da bovas

Las bovas dad avant trais emnas a Scuol n'han betg mo chaschunà donns da material, percenter er donns economics. La Val S-charl è stada serrada bunamain 10 dis. En S-charl, en la fracziun da Scuol datti dus hotels. Il turissem dal di è crudà ensem totalmain. Ma er quai che perturga las pernottaziuns. Ils giast ch'eran en S-charl èn vegnids sgulads ora cun il helicopter, giast novs hai dà mo pacs. La perdita en Val S-charl, che nagin surpiglia, surpasa ils 100'000 francs. Er la fracziun da Pradella ha sumegliants donns economics. Duas chasas da vacanzas cun radund 140 plazzas èn donnegiadas e restan serradas fin la fin da l'onn. Quellas avessan gi occupaziuns per radund 10 emnas.

Premi per Göri Klainguti

La cumissiun che promova la cultura en Engiadina'Ota propona al parlament da surdar il premi 2015 a *Göri Klainguti*. L'autur e scriptur da Samedan saja s'engaschà fermamain durant decennis a favor da la lingua rumantscha. L'um da 70 onns ha scrit numerus texts umoristics sco er criminals ed el è co-redactor dal Chalender Ladin. Il premi da reconuschientscha è dotà cun 8'000 francs.

En la sparta musica e litteratura vul la cumissiun surdar a la Samedrina *Laura Zangger* il premi da promoziun da 4'000 francs. La musicista professionala s'engascha in differents chors, bands, ensembles ed orchesters. Plinavant duai er il musicista *Curdin Nicolay* da Bever survegnir quest onn in premi da reconuschientscha. La surdada dals premis ha lieu en in rom festiv ils 30 d'october 2015 a Samedan.

Audienza privata per ils Kloten Flyers en claustra

Als Kloten Flyers plascha tar las mungias en la Clostra Son Jon a Müstair. Sin via di a la Cuppa da las Dolomitas a Bulsau han els visità per la segunda giada lur fans fidaivels, questa giada tut privat, senza medias e pressa. En la curt da la claustra han els giudi ina marena cuminaivla. La gievgia a mezdi en la Claustra Son Jon da Müstair: il Club da Hockey «Kloten Flyers» fa visita tar las mungias benedictinas. La scuntrada è cordiala. Ils Flyers portan regals e filosofeschan cun las mungias. Las mungias ed ils giugaders da hockey èn vegls enconuschents. Las mungias èn numnadamain dapi onns fans fidaivels dals 'Kloten Flyers' e na manchentan betg in giäu da lur team preferì. Perquai che las mungias vivan in ina claustra serrada, n'era quai dentant betg pussaivel dad ir ina giada a guardar in giäu live. Grazia a l'engaschi dal nev da la priura Domenica era il numpussaivel daventà realitad l'atun 2013: ils Kloten Flyers eran vegnids en claustra sin visita. En il film «Ora et labora – ed ils Flyers» ha il redactor Stefan Dobler perpetuà quest mument.

Tavau/San Murrezzan: Annunzia da spariziun

Dapi mesemna, ils 12 d'avust, vala Maria-Luise Buxbaum sco sparida. La dunna austriaca ha bandunà enturn mezdi l'hotel Seehof a Tavau, nua ch'ella fasscheva ina cura. Cun il tren vuleva ella far in'excursiun a San Murrezzan. Ella n'è dentant betg pli turnada e vala sco sparida. Maria-Luise Buxbaum ha 58 onns, è 1 meter e 65, da statura mesauna ed ha chavels grischs. La polizia supplitgescha persunas, che pon far ulteriuras indicaziuns, da s'annunziar.